

Xujun xi ma joho xi kits'inntu nda postru Pedro

B'i ts'in kikjaniñaha Pedro xuta ninku

1 An Simon Pedro, an nda musu síhìn kò nda postruhu Jesucristo títs'inkjínuu xujun jun xi ja ta kin'ekjóhoo nga s'ejinnuu Ntíaná xi nkúhu jin, tu ngat'aha nga naxu kits'in Jesucristo, kui xi Ntíaná kò kui xi ts'ínk'ankiná. Ndahankjún tjin nga s'ejinnuu.

²Kas'e nkjúnnuu kjuanda kò kjuajyu at'aha yo Ntíaná kò Jesucristo xi Nda Ntíaná maha.

B'i ts'in tsakúya Pedro xi nkú ts'in tjihin nga k'úéentu xuta xi ts'e Ntíaná

³Ngat'aha kjuachánkaha kò kjuandaha Ntíaná j'ájihinná. Kò tu ngat'aha nga yaá xi j'ájinná, b'a ts'in nga'yúhùn kitsjákohoná ngayjee ni xi machjénná, tu xi kuintsuba tík'uhunná kò tu xi chankjúhunná Ntíaná. ⁴B'a ts'in kitsjahaná ni xi kitsúya tíjün, xi 'yún chjí kò xi 'yún chánka, tu xi b'a ts'in kuiyúhu ruu ni xi nechaha animaha xuta, ni xi títs'ínkatsúhùn asuntee, tu xi sakúhunu nga kuintsuba tík'un xi nkú ts'in tjíña tík'un Ntíaná.

⁵Nk'ie nga ja s'ejinnuu Ntíaná n'e kjuayúhùn yjonuu nga t'esún sohoo nga kixi tankínkoo yjonuu. Kò nga kixi t'bankínkoo yjonuu t'esún sohoo nga mankjinnuu ni xi ts'e Ntíaná. ⁶Kò nga mankjinnuu t'esún sohoo nga ja manuu b'ech'ó suboo yjonuu ni xi tjin asuntee. Kò nga ma b'ech'ó suboo yjonuu t'esún sohoo nga tjinnuu kjuatsenta. Kò kjuatsentoo t'esún sohoo nga tíyankjún Ntíaná. ⁷Kò nga tíyankjún Ntíaná t'esún sohoo nga tín'etjò xuta ninku, at'aha kui xi já nts'o maha. Kò nga tín'etjò xuta ninku t'esún sohoo nga tjinnuu kjuatjo.

⁸At'aha tsa b'a n'e kuintsuboo kò tsa tu nkú b'a n'enú, kama ndjuút'a ni xi ja yohoo Nda Ntíaná Jesucristo. Kui ni xi kuasinkonuu nga nda n'etjusun ni xi n'o kò najmi kuintsuba ts'o. ⁹Tunga xi najmi b'a ts'in tjintu, kui xi najmi ma chjihí. Ka ma. Títs'ínchaya nga ja tsichu ma jehe ngatitsun xi kis'ehe nistjin nk'ie.

¹⁰Kui b'a maha, já nts'e, n'e kjuayún saha ruu yjonuu nga takúchjiu nga kjuaxi nga Ntíaná ja kinchjanuu kò j'ájinnuu. At'aha

tša b'a n'e kuintsu_{oo}, ndahachí najmi kuankíun t'axíhuun Ntíaná. ¹¹B'a ts'in k'ua_{inte} tsjo tsjohonuu nga kuitjás'oon má batéxuma sín Nda Ntíaná Jesucristo. Kui xi ts'ínk'an_{kiná}.

B'i ts'in títšuya Pedro mí kjuaha nga tu nkú t'ibakúyahá ra xuta ninku

¹²Kui nga ts'inkj'áitsjen tehentehenuu ni xi t'ib'et'ánuu, ndaha tša ja yo kō ndaha tša ja ndjá tinchajiun ni xi naxu tjin xi ja yo. ¹³An kjinena nga ts'inkj'áitsjennuu niu nk'ie nga tíjñaya sa yjoninte xu'bi. ¹⁴At'aha ja be nga chubahá ndyjahá nga k'uejñá yjoninte xu'bi, xi nkú ts'in y'éjñá chjina Nda Ntíaná Jesucristo. ¹⁵Kō ts'ian nga'yún, nga nk'ie nga ja k'uejñá asunntej, tu nkú n'ekjáitsjennú ni xi tíxinuu.

¹⁶Nk'ie nga tsixinyaihi xi nkú ts'in kj'uaí Ndantíaná Jesucristo, xi nkú ts'in kj'uaíko nga'yún chánkaha, najmi én tsank'á xi najmi chumi ni chj'ihí ra kin'echjéin. Kjuachánkaha ní y'ejñá chji, kui xi tunkuin tunkuin kiyahani. ¹⁷Ntia Na'miná kitsjáha nga chankjún kō nga s'ehe kjuachánka nk'ie nga kinu'yá ntaha Ntíaná xi tu xí t'ihín ra kjuachánka. B'i kitsú: “Kui xu'bi xi Ntína. Tjona kō tsjo mana.” ¹⁸Jin kinu'yái nta xu'bi xi nibaha nk'a ján nk'ie nga tintsu_{ba}koj Jesucristo tjennki xi má kama kjuankjúun.^a

¹⁹B'a ts'in bitju naxuhu én xi kinchja já profeta nk'ie. Nda t'n'o tša t'ibasinñjuhuu éen. Kui xi nkú joyaha nd'í xi t'ib'at'ai má jyuun santa nkúhu nga kuichú ma sen nistjin xi ma ndyjuun kō niñu xi ma chji nga ta jyuun ts'in ndzjen ajin animanu. ²⁰Katumankjinnuu nga ndaha nku ni xi kinchja já profeta, xi tjt'a xujun éhen Ntíaná, najmi ma mjenaxá xi nkú ts'in mjená. ²¹At'aha najmi animaha xuta nibaha ni xi kinchja já profeta. Espirituhu ní Ntíaná kits'in nga kinchja xuta én xi nibaha ra Ntíaná.

B'i ts'in tsakúya Pedro ni xi ts'in já maestru tsank'á xi tjinjihin xuta ninku

2 Ajihin xuta xi ntje judio tjeheh ra kis'e já profeta tsank'á, xi nkú nga ta ts'in s'e ajinnuu já maestru tsank'á. Kui xi já mañá xi ngakjá kuakúya ni xi ts'e Ntíaná. Kj'ai ni xi kuakúyanuu, kui xi ts'ínkatsúnnuu. Najmi ts'ínkie yjoho nga Nda Ntíaná xi ts'asjehin. B'a ts'in kitsa ts'in nibánehe ra yjoho nga n'ekje. ²Nkjin xi incha ts'in ni xi incha ts'in jóo, ni xi tu subahá maná. Kui ngat'aha jóo ch'on ts'in chubayanéhe ni xi naxu tjin. ³Tu ngat'aha nga 'yún incha mjehe toon, kui nga k'ua_nqachahanuu nga kjé'anuu ni xi ts'ajun. Ngat'a ts'e jóo ja nd'ai t'indaha ra yjoho xi ts'ínnijéhe ra. Ja tíjña nda nistjin nga n'ekje.

^a 1.18 “Tjennki má kama kjuankjúun.” Chasejhi Mateo 17:1-5; Marco 9:2-7; Luca 9:24-35.

⁴Nístjin nk'ie Ntíaná najmi kits'ínndyjat'ahq ntítsje xi incha kits'ín ngatitsun. Ajin ngak'ien ní kikj'aníkj'aya. Má jyuun kingjáya'yún, tjíntu nda nga n'ekokjua. ⁵Ko ta ndaha najmi kits'ínndyjat'ahq xuta xi kis'e nú chá ján. Ntá kits'ínkjekoho xi najmi kikienkjúhún. Tunga máha Noe, kui xi y'énijmí ni xi naxu tjín, kui xi kin'enk'aniki ko yatu sa xuta.

⁶Ta y'éjñanehe Ntíaná nga n'ekje nanki Sodoma ko nanki Gomorra. Tu nasuhú kits'ín ma naxinantóo. B'a ts'ín y'éjña nkjúhún ra xuta xi s'e askahan xi najmi skuenkjún Ntíaná. ⁷Tunga kits'ínk'anikihi Lot, kui xi nku nda xi naxu kits'ín, xi un kiekehe nga kieke xi nkú ts'ín y'entu xuta ch'onk'un xi kitsjantehe yjoho nga kits'ín tu mí nihí ni. ⁸At'ahq nda xu'bi xi naxu kits'ín, xi y'ejñajihin xuta xu'bo, xki nístjin un nkjún kiekehe nk'ie nga kieke ko kint'é ni ch'onk'un xi kits'ín jóo. B'a kamaha at'ahq je týyahq.

⁹Kui b'a maha, ngayjee nii bakúchji xi nkú ts'ín Ntíaná maha b'asjenki xuta xi benkjúhún ajihin ni xi nibánehe, ko be xi nkú ts'ín kuyáko xuta xi najmi naxu ts'ín, xi tjíhin nga un skuéhe nga kuichú nístjin nga chésehe mí nihi xi kits'ín nga nkúnkú xuta. ¹⁰Ko 'yún un skuéhe xi tjíntujín ni chuntí xi nechjaha animaha ko najmi benkjún xi tjíhin xá nk'a ján. Kui jóo xi si ko tu mí nihí ni xi incha ts'ín. Najmi tsankjún nga ch'on ts'ín nechjayane xi i nk'a ján. ¹¹Tunga ntítsjee, ndaha tsa 'yún tjíhin nga'yún ko nga nk'a tjen nga já xu'bo, najmi ch'on ts'ín nechjayane xi ch'onk'un xi tjíhin kjuachánka ko najmi batéjéne nginkun Ntíaná.

¹²Tunga máha já xu'bo, chuba ch'ohón ts'ín nechjane ni xi najmi mankjihin. Kui xi nkú joyaha chu. Najmi maha ts'ínnkjink'un. Chuba tjíntuhú nga ts'ín ni xi nibá suba kuihi. Kui xi xi nkúhu chu xi nuba ko n'ek'ien. Kui nga ndyjaha jóo xi nkúhu chu. ¹³Ts'ínkjáihin chjíhi ni ch'onk'un xi incha ts'ín. B'a tsu nga sakúhu kjuatsjo nk'ie nga títs'íntsojín tu mí ni ch'onk'uhún ni nga nístjiun. Kui jóo xi nkú joyaha chuntí ko tsján ajinnuu. Santaha ts'íntsojín kjuanajmindaha nk'ie nga kjinekonuu niñu.

¹⁴Najmi ma be nda nku tachjuún. Najmi mjét'íahq nga ts'ín ngatitsun. B'anachaha xuta xi najmi ndjá tíincha. Tu ni xí kitsa xáha ts'ínnkjink'un nkú ts'ín sakúhu ra toon. Ni xi ts'ín, kui xi ngjuaikoho má nga ndyja. ¹⁵Ja ngji t'axíhin ni xi naxu tjín ko ja kindyjajihin, kui nga b'a tíincha ts'íhin xi nkú kits'ín nda profeta Balaam xi ntíhi Beor. Kits'ín mje toon Balaam ko j'áchjí nga kits'ín ni xi najmi nda. ¹⁶Tunga kichubatikohó ngat'ahq ngatitsuhún. Búrrúhu, chu ch'á xi najmi maha nechja, ntaha xuta kik'a nga y'éch'oho Balaam nga ts'ín kjualuku xi títs'ín kai.

¹⁷Já xi t'banachaha xuta, kui xi nkú joyaha ntá tixa xi najmi tjíhin ntá, nintí xi tu má fikohó ra ntjo. Kui xi tjeheñ ra má tu xí jjuhún.

¹⁸Incha nchja én ngak'un ko én xi najmi tjihin sin. Bakúya nga ma n'e ni xi nchjaha xuta ko nga ma ts'in tu mí nihí ni. B'a ts'in b'anachaha ra xi as'ai kikjexihín yjoho ajihin xuta xi tjintujín ni xi najmi b'a tjín. ¹⁹Ndaha tsa ni xi ts'ínkatsúhün xuta tjí'yúhün, tunga chüba b'ahá incha tsu nga ts'ín ndaíhi xuta. Tjí'yún jóo, at'aha ni xi ts'in nganáná, kui xi b'é'yúnná.

²⁰Tsa ja incha tsankin t'axíhín ni ch'onk'un xi tjín asuntei at'aha kin'ekjáihín Nda Ntíaná Jesucristo xi b'asjejinná, tunga tsa ta kujnejihín ngáhaná kui niu ko n'endyjahaa, 'yún ch'onk'un ma sahá akahan. ²¹Kui nga tu sahá ra nda tjín tsa najmi kieke jóo ni xi naxu tjín, at'aha 'yún kama ch'onk'un sa nga kieke ni xi ndoo. B'a kamaha nga ngji t'axíhín kjuatéxuma je xi kik'aihi. ²²Tíbitjusunjíhín jóo én xi nchja xuta: “Nañoó ta kjine ta ma ngáha ni xi bisuhu. Chínka xi as'ai mama kabinguya tím'otikjájín yjoho siu.”

B'i ts'in tsakúya Pedro nk'ie nga kj'uaí ts'ínkokjua Nda Ntíaná Jesucristo asuntee

3 Tjona jun, já nts'e. Xu'bi xi xi ma joho ra xujun xi títs'inkjínuu. Xujun xu'bi ko xi tjuun y'et'ánuu tu xi n'ekj'áítsjehennu ni xi ja tsakuyánuu. B'a kits'ian tu xi chahanu xi nkú ts'in s'eyahanuu. ²N'ekj'áítsjohon yjonuu én xi kinchja já profeta je xi kis'e nistjin nk'ie ko kjuatéxuma xi tsakúyanuu já postru, kjuatéxumaha Jesucristo xi Nda Ntíaná maha ko kui xi ts'ínk'aniná.

³Katumankjin sisinnuu nga nistjin xi fekuu s'e xi k'úéntujín ni ch'onk'un xi nchjaha animaha ko kujnukie én xi ja kin'ekj'óhon. ⁴B'i incha kuitsu: “¿Á najmi tsitjusuhun én xi kitsúhu nga kj'uaí ngáha? B'aha ra nistjin nga k'ien ntje cháná santaha nd'ai, tu nkú b'ahá tíma asuntei xi nkú kama nk'ie nga as'ai kamandahá.”

⁵Najmi mjehe ts'ínkj'áítsjen nga nistjin nk'ie én xi tsitjuhu ts'a Ntíaná kits'índakoho nk'a ján ko t'anankiu. Kui t'anankiu xi ajin ntánijuo nibahaha ra ko ngat'aha ntánijuo kis'ejñaha. ⁶Ko ngat'aha ntánijua ts'í xi 'yún kits'oo kin'ekjehe t'ananki xi kis'ejña nistjin nk'ie. ⁷Tunga máha nk'a ján ko t'ananki xi tjíña nd'ai, kui xi ta kuihi éhen Ntíaná tíb'ejña ndaha tu xi k'uétihi. Tís'ejña nda santa nkúhu nga kuichú nistjin nga chasehe mí nihi xi kits'ín nga nkúnkú xuta ko nga n'ekje xuta xi najmi kikienkjún Ntíaná.

⁸Tunga najmi tu n'echayanú ni xu'bi, já nts'ena. Nginkun Ntíaná nku nistjin, kui xi nkú joyaha nku mii nú. Ko nku mii nú, kui xi nkú joyaha nku nistjin. ⁹Najmi títs'ínk'andaya Ntíaná nga ts'íintjusun ni xi kitsúya tíjün, at'aha k'ua xi b'a maha nga títs'ínk'andaya. Tíbakú nínuu kjuatsentaha Ntíaná, at'aha najmi mjehe tsa tjín xi ndyja. Mjehe nga ngatentee xuta ngjuaikj'áha ra animaha.

¹⁰Xi nkú ts'in tu ndyjaháná nga f'ai nku nda ndyjé, b'a kama nistjin nga kj'uaí ngáha Nda Ntíaná. Kui nistjiun ndyjajihínsén nk'a

ján nga ni xi nkjún ts'ín kjuaneyá, ko kamanantá nga kuiti ni xi kamandakoho ni xi tjín. T'anankiu ko ngayjee ni xi tjíhin kuiti.

¹¹Kui b'a maha, tsa b'a ts'ín n'ekatsún ngayjee niu, ¿nkú ts'ín tjíhin nga kuitsuboo ni ma? Tjíhin nga je kuintsuboo ko chankjún Ntíaná ¹²ko nga kamangimjenuu nga kuichú nistjin nk'ie nga ts'ín Ntíaná ni xi kitsú nga ts'ín, nistjin nk'ie nga kuiti ko n'ekje nk'a ján ko nga nd'íu ts'ínnantá ni xi tjín. ¹³Tunga máha ñá, tichuyáá nku nk'a tsetse ko t'ananki tsetse, xi nkú ts'ín kitsúya títjun Ntíaná. Yohó má nga naxu kuintsubaá nginkun Ntíaná.

¹⁴At'aha tichuyóhoo ni xu'bi, jántsena, kui nga tjen nga'yúhun ruu yjonuu tu xi s'ehenuu kjuajyu nginkun Ntíaná ko tu xi najmi s'ehé ajinnuu ni xi chuntí ko tsa ni xi chubayané. ¹⁵T'ejintak'un, títakúchjiná kjuatsentaha Ntíaná tu xi títsjántehená nga k'uankiá. Ni xu'bi ja ta y'ét'anuu nda nts'ena Pablo. Kui xi xi nkú ts'ín tjíña kjuankjintak'un xi kitsjáha Ntíaná, b'a ts'ín yét'a. ¹⁶Nga nkúnkú xujun xi kits'ínnu ta kui ni xu'bi kinchjanímíyaha. Tjín ni xi y'ét'a xi 'ni mankjihin xuta. Kui niu xi fiko ngakjá xuta xi najmi be sisin ni xi ts'e Ntíaná ko xi najmi ndjá tinchajin ni xi s'ejinná. Fiko ngakjá niu xi nkú ta ts'ín ta fikongakjá ni xi ja ta tjít'a. B'a ts'ín ta kuihi títs'ínkjihí yjohó má ndyja.

B'i ts'ín kits'ínkje Pedro xujun

¹⁷Kui b'a maha, já nts'ena, ja yo ni xu'bi. Kui nga chúhun ruu yjonuu tu xi najmi kjébéfehenuu kjuab'anachaha já ch'onk'uun, ko tu xi najmi kuankín t'axíhin ruu ni xi ndjá tinchajiun. ¹⁸Kasájin so kjuandaha Jesucristo ko kaya so ni xi ts'e, at'aha kui xi Nda Ntíaná maha ko ts'ínk'ankiná.

¡N'ekié yjoná nga tjíhin kjuachánka nd'ai ko santaha tu nkjéhé ni! B'a katuma.